

I - ARABAKO BILTZAR NAGUSIAK ETA ARABAKO LURRALDE HISTORIKOAREN FORU ADMINISTRAZIOA

ARABAKO BILTZAR NAGUSIAK

25/2014 Foru Araua, uztailaren 9koa, gastatutako erregai nuklearra eta hondakin erradiaktiboak instalazio zentralizatueta biltegitratzearen gaineko Zergari buruzkoa

Arabako Biltzar Nagusiek 2014ko uztailaren 9an egindako osoko bilkuran ondoko foru araua onetsi dute:

25/2014 Foru Araua, uztailaren 9koa, gastatutako erregai nuklearra eta hondakin erradiaktiboak instalazio zentralizatueta biltegitratzearen gaineko Zergari buruzkoa

ZIOEN AZALPENA

Ekonomia Itunaren Batzorde Mistoak Ekonomia Ituna aldatzea erabaki du, besteak beste gastatutako erregai nuklearra eta hondakin erradioaktiboak instalazio zentralizatueta biltegitratzearen gaineko zerga adosteko.

Itun hori Arabako Biltzar Nagusiek berretsi dute, otsailaren 26ko 4/2014 Foru Arauaren, Ekonomia Itunaren Batzorde Mistoaren lehenengo erabakia berrestekoaren, bidez.

Ekonomia Itunaren 23 quinquies artikulua arabera, gastatutako erregai nuklearra eta hondakin erradioaktiboak instalazio zentralizatueta biltegitratzearen gaineko zerga itundutako zerga da, estatuak une bakoitzean ezarritako arau oinarritzko eta formal berberen bidez eraenduko dena.

Aurrekoaren arabera, foru arau honen bidez gastatutako erregai nuklearra eta hondakin erradiaktiboak instalazio zentralizatueta biltegitratzearen gaineko zergaren erregulazioa Arabako Lurralde Historikoko zerga sisteman sartuko da, Arabako zerga sistema harmonizatzeko helburuarekin, haien erabilera ingurumenarekiko eta iraunkortasunarekiko eraginkorragoa eta begirunetsuagoa izan dadin, betiere Europar Batasunaren zerga, energia eta, noski, ingurumen politika arautzen duten oinarritzko printzipioekin bat etorritik.

1. artikulua. Izaera

Gastatutako erregai nuklearra eta hondakin erradioaktiboak instalazio zentralizatueta biltegitratzearen gaineko zerga zuzeneko eta izaera errealeko zerga da. Bere zerga egitatea osatzen duten eta foru arau honen 4. artikuluan aipatzen diren jarduerak zamatzen ditu.

2. artikulua. Araudi aplikagarria

1. Ekonomia Itunaren 23 quinquies artikuluan xedatutakoaren ildotik, zerga foru arau honetan eta hura garatzen duten xedapenetan xedatutakoarekin bat etorritik eskatuko da.

2. Foru arau honetan ezarritakoak ez du ezertan eragotziko barne antolamenduaren osagai bihurtu diren nazioarteko itunetan eta hitzarmenetan xedatutakoa.

3. artikulua. Zergaren ordainarazpena

Zergaren ordainarazpena Arabako Foru Aldundiari egokituko zaio, gastatutako erregai nuklearra eta hondakin erradioaktiboak biltegitratzen diren instalazioak Arabako Lurralde Historikoan daudenean.

4. artikulua. Zerga egitatea

Zergaren zerga egitatea gastatutako erregai nuklearra eta hondakin erradioaktiboak instalazio zentralizatu batean biltegitratzeko jarduera izango da.

Zerga honen ondorioetarako, gastatutako erregai nuklearraren eta hondakin erradioaktiboen biltegiatzea izango da beraien aldi baterako edo behin betiko ibilgetzean datzan jarduera oro, nola egiten den kontuan izan gabe. Instalazio zentralizatua, berriz, material horiek, instalazio edo jatorri ezberdinetatik etor daitezkeenak, biltegiatu ahal dituen instalazioa izango da.

5. artikulua. Salbuespenak

Ondoko jarduera hauek zergatik salbuetsiko dira: jarduera mediko edo zientifikoetatik datozen hondakin erradioaktiboak biltegiatzea, eta araudi nuklearraren pean ez dauden industriako instalazioetan gertatzen diren gorabehera berezietatik (Segurtasun Nuklearreko Kontseiluak hala izendatzen baditu) edo instalazio horietan detektatzen direnetatik datozen hondakin erradioaktiboak, jarduera handiko kapsulatutako iturri erradioaktiboen eta iturri zurtzen kontrolari buruzko otsailaren 24ko 229/2009 Errege Dekretuaren 11.2 artikulua aipatzen dituen akordioen esparruan kudeatzen badira.

6. artikulua. Zergadunak

Zerga honen zergadunak dira Arabako Zergei buruzko otsailaren 28ko 6/2005 Foru Arau Orokorren 35. artikuluko 3. idatz zatian aipatzen diren pertsona fisiko edo juridikoak eta erakundeak, 4. artikuluan aipatutako jarduerak egiten diren instalazioen titularrak badira.

7. artikulua. Zerga oinarria

1. Gastatutako erregai nuklearra eta hondakin erradioaktiboak instalazio zentralizatuetan biltegiatzearen gaineko zergaren zerga oinarria hau da:

a) Gastatutako erregai nuklearrean dagoen metal astun biltegiatuak zergaldiaren amaieran duen pisuaren eta hasieran duenaren arteko aldea, kilogramotan emana.

b) Biltegiatuta dauden jarduera handiko hondakin erradioaktiboek (gastatutako erregai nuklearra ez direnek) edo jarduera ertaina eta bizialdi luzea duten hondakin erradioaktiboek zergaldiaren amaieran daukaten bolumenaren eta hasieran daukaten bolumenaren arteko aldea, metro kubikotan emana.

c) Zergaldian instalazioan biltegiatzeko sartu diren eta aurreko b) idatz zatian ez dauden jarduera ertaineko eta jarduera txiki edo oso txikiko hondakin erradioaktiboen bolumena, metro kubikotan emana.

2. Zerga honen zerga egitatea osatzen duten jarduerak egiten diren instalazioetako bakoitzerako zehaztuko da artikulua honetan definitutako zerga oinarria.

8. artikulua. Jarduera ertain, txiki eta oso txikiko hondakinen biltegiatze zentralizatuaren likidazio oinarria

1. Jarduera ertain, txiki eta oso txikiko hondakinen biltegiatze zentralizatuan (7. artikuluko 1.c) idatz zatian aipatzen dena), likidazio oinarria ateratzeko, murrizpeneko K koefiziente biderkatzaile bat zerga oinarriari aplikatuko da, formula honen arabera:

$$LO = K \times ZO$$

Non:

LO: Likidazio oinarria.

ZO: Zerga oinarria.

2. K koefizientea formula hau aplikatuz aterako da:

$$K = \frac{V_{TE} + V_T \times f_T + V_{SE} \times f_{SE} + V_{LE} \times f_{LE} + V_{MS} \times f_{MS}}{V_{TE} + V_T + V_{SE} + V_{LE} + V_{MS}}$$

Non:

V_{TE} : Behin betiko biltegitratzeko sartzen diren hondakin trinkotu ezinen eta errautsi ezinen bolumena.

V_T : Behin betiko biltegitratzeko sartzen diren hondakin trinkogarrien bolumena.

f_T : Bolumena trinkotuz murriztearen faktorea.

V_{SE} : Behin betiko biltegitratu baino lehen errausten diren hondakin solidoen bolumena.

f_{SE} : Hondakin solidoak erraustuz murrizten den bolumenaren faktorea.

V_{LE} : Behin betiko biltegitratu aurretik errauspen tratamendua ematen zaien hondakin likidoen bolumena.

f_{LE} : Hondakin likidoak erraustuz murrizten den bolumenaren faktorea.

V_{MS} : Behin betiko biltegitratu baino lehen trinkotze eta errauste tratamendu mistoa aplikatzen zaien hondakinen bolumena.

f_{MS} : Trinkotzearen eta erraustearen tratamendu mistoaren bidez murrizten den bolumenaren faktorea.

3. Murrizpen faktoreek ondoko balioak hartuko dituzte:

FAKTOREA	BALIOA
f_T	$\frac{1}{2,6}$
f_{SE}	$\frac{1}{12,1}$
f_{LE}	$\frac{1}{15,3}$
f_{MS}	$\frac{1}{7,8}$

9. artikulua. Zerga tasa eta zerga kuota

Zerga oinarriari, edo likidazio oinarriari, 8. artikuluan ezarritakoaren arabera, ondoko zerga tasak aplikatzearen ondorioa izango da zerga kuota:

a) 7. artikuluko 1.a) idatz zatian aipatzen den gastatutako erregaiaren biltegitratzean, tasa 70 eurokoa izango da metal astuneko kilogramo bakoitzeko.

b) 7. artikuluko 1.b) idatz zatian aipatzen den hondakin erradioaktiboen biltegitratzean, tasa 30.000 eurokoa izango da hondakin erradioaktiboko metro kubiko bakoitzeko.

c) 7. artikuluko 1.c) idatz zatian aipatzen diren hondakin erradioaktiboen biltegitratzean:

1. Jarduera txiki eta ertaineko hondakin erradiaktiboentzat, 10.000 euro metro kubiko bakoitzeko.

2. Jarduera oso txikiko hondakin erradiaktiboentzat, 2.000 euro metro kubiko bakoitzeko.

10. artikulua. Zergaldia eta sortzapena

1. Zergaldia urte naturala izango da, salbu eta zergadunak 4. artikuluan jasotako zerga egitate den jarduera eteten badu; kasu horretan jarduera amaitzen den egunean bukatuko da zergaldia.

2. Zerga zergaldiaren azken egunean sortuko da.

11. artikulua. Likidazioa eta ordainketa

1. Zergadunek zergaren autolikidazioa egin eta kuota ordaindu beharko dute zerga sortu ondorengo lehenengo 25 egunen barruan, Arabako Foru Aldundiko Ogasun, Finantza eta Aurrekontu Saileko diputatuak ezarritako arau eta ereduaren arabera.

2. Apirileko, uztailako eta urriko lehenengo 25 egunetan, 4. artikuluan ezarritako zerga egitatearen egiten duten zergadunek ordainketa zatikatua egin beharko dute aribideko zergaldiari dagokion likidazioaren kontura, Arabako Foru Aldundiko Ogasun, Finantza eta Aurrekontu Saileko diputatuak ezarritako arau eta ereduaren arabera.

Zerga oinarria zehazten duten magnitudeen arabera, zatikatutako ordainketa bakoitza egiteko epearen hasieraren aurreko hiruhileko naturalari dagozkionak, kalkulatu da zatikatutako ordainketen zenbatekoa, foru arau honen 9. artikuluari dagokion zerga tasa aplikatuz.

12. artikulua. Arau hausteak eta zehapenak

Zerga honekin lotutako arau hausteak otsailaren 28ko 6/2005 Foru Arau Orokorrak, Arabako zergenak, eta Diputatuen Kontseiluaren azaroaren 18ko 97/2008 Foru Dekretuak, zerga arau hauste eta zehapenen arautegia onartzen duenak, aurreikusitakoarekin bat etorritik sailkatu eta zehatuko dira.

AZKEN XEDAPENAK

Lehenengoa. Indarrean jartzea.

Xedapen orokor hau ALHAOn argitaratu eta hurrengo egunean jarriko da indarrean eta 2013ko urtarrilaren 1etik aurrera izango ditu ondorioak.

Bigarrena. Gaitzea.

Arabako Foru Aldundia gaitu egiten da xedapen orokor hau garatzeko eta aplikatzeko beharrezkoak diren xedapen guztiak eman ditzan.

Vitoria-Gasteiz, 2014ko uztailaren 9a

Lehendakaria

JUAN ANTONIO ZÁRATE PÉREZ DE ARRILUCEA